

DOMENIE II DI AVENT

Jutoris pe Liturgjie

Domenie, ai 10 di Dicembar dal 2017

La glesie, dopo di vênus presentade la mari di Gjesù te solenitât de Imacolade Concezion, nus invide vuê, midiant dal inizi dal vanzeli di Marc, a svicinâsi a un profete, anzit a plui di un profete (Mt 11,9): Zuan Batiste. Lui, orepresint, al è Vôs di un ch'al berle tal desert: Splanait la strade dal Signôr, dreçait i siei trois.

Duncje in companie di Marie e des esortazions dal profete o vignìn invidâts a continuâ sul troi che al mene a Betlem e a la Nativitât.

Intant, la liturgjie e continue a sigurânus: il Signôr al vignarà a salvâ i popui / e al fasarà sintî la sô vôs tremende / pe gjonde dal vuestri cûr.

Antifone di jentrade

cf. Is

30,19.30

Popul di Sion,

il Signôr al vignarà a salvâ i popui
e al fasarà sintî la sô vôs tremende
pe gjonde dal vuestri cûr.

No si dîs Glorie a Diu.

Colete

Diu onipotent e bon di cûr,
fâs che nissune robe di chest mont nus inderedi
te nestre corse viers di to Fi,
ma la scuele de sapience dal cîl nus fasi mertâ di spartî la sô glorie.
Lui ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 40,1-

5.9-11

Prontait la strade dal Signôr.

Al ven cuasi di dî che la glesie no podeve sielzi lezion miôr par cjacarânus dal event de nassite dal Signôr. La lezion e je cjapade dal libri di Isaie te sezion clamade Secont Isaie (cjap. 40-55) o ancje: Libri de consolazion. O sin tal secul VI p.d.C. e ai depuartâts a Babilonie ur ven nunziade la fin de sclavitût e la zornade de liberazion.

In chest mont mat che o vivìn, la liturgjie nus ven in jutori: Consolait, consolait il gno popul - nus da une esortazion: tal desert prontait la strade dal Signôr! - e une peraule sigure: Ve, il Signôr Diu al ven.

Dal libri dal profete Isaie

«Consolait, consolait il gno popul,
al dîs il vuestri Diu.

Fevelait al cûr di Gjerusalem
e contait

che la sô vore e je finide,
che la sô colpe e je scontade,
ch'e à vût de man dal Signôr
il dopli par ducj i siei pecjâts».

Une vôs e berle:
«Tal desert prontait
la strade dal Signôr!
Dreçait te pustote
la strade pal nestri Diu.
Ogni concje ch'e sedi colmade,
e ogni mont e culine ch'a sedin sbassadis,
il teren grumbulôs ch'al deventi plan
e chel di rive une concje;
alore si pandarà la glorie dal Signôr
e ogni om le viodarà;
parcè che la bocje dal Signôr e à fevelât».
Va sù suntune mont alte,
tu che tu puartis buinis gnovis in Sion!
Alce a fuart la tô vôs,
tu che tu puartis buinis gnovis in Gjerusalem!
Alcile, e no sta vê pôre!
Disiur a lis citâts di Gjude:
«Ve il vuestri Diu!
Ve, il Signôr Diu
al ven indenant cun fuarce,
cul so braç lui al parone dut;
ve, al à daûrsi il so premi,
la sô pae e cor denant di lui.
Come un pastôr lui al passone il trop,
lu tire dongje cul so braç,
al puarte i agneluts sul pet,
e al fâs lâ indenant biel planc lis pioris ch'a dan di lat».
Peraule di Diu.

SALM RESPONSORIÂL

Dal Salm

84

Tu che tu âs liberât i presonîrs di Israel, Mostrinus ancje a nô, Signôr, la tô misericordie e danus la tô salvece.

Scoltade la leture, e je cheste la invocazion tal malstâ spirituâl nestri e de nestre societât.

Il salm 84, tant cjâr al timp dal Avent, nus rispuint presentant i dons di Diu: pâs, salvece, bontât, fedeltât, justissie.

E nus vise: Sigûr che la salvece e je dongje par chei che lu rispjetin.

R. Mostrinus, Signôr, la tô misericordie e danus la tô salvece.

Se cjantât: Il cjant dai salms responsoriâi, p. 94.

O vuestri scoltâ ce ch'al dîs Diu;
il Signôr sigûr di pâs al fevele
pal so popul e pai siei fedêi.
Sigûr che la salvece e je dongje
par chei che lu rispjetin;
la sô glorie e tornarà di cjase te nestre tiere. **R.**

Bontât e fedeltât si son strenzudis,

justizie e pàs si son bussadis.
La fedeltât e menarà sù de tiere
e e cucarà jù dal cîl la justizie. **R.**

Di fat il Signôr nus darà ogni ben di sorte
e e butarà il so prodot la nestre tiere.
La justizie e cjamine denant di lui,
e su l'olme dai siei pas la dretece. **R.**

SECONDE LETURE

2 P

3,8-14

Nô o spietin cîi gnûfs e une tiere gnove.

Pieri al cjacare culi de fin dal mont che lis comunitâts cristianis a stavin spietant. Noaltris, intant che o fasìn memorie de nativitât dal Signôr, o savìn che i cîi a passaran, ma o savìn ancje che in chest an, te liturgjie dal Nadâl, il Signôr al sarà fra di nô.

E alore: trop sante e plene di religjon no aie di jessi la vuestre vite, biel ch'o spietais e o corês incuintri a la vignude de zornade dal Signôr,

De seconde letare di san Pieri apuestul

Une robe no vês di pierdile di voli, miei cjârs: denant dal Signôr une zornade e je tant che mil agns e mil agns a son tant che une zornade sole. Il Signôr no si inclape tal mantignî ce ch'al à imprometût, come ch'al scrupule cualchidun; ma al dopre pazience cun vualtris parcè che nol vûl ch'al vedi di pierdise nissun ma che duçj a vedin mût di mendâsi. La zornade dal Signôr e vignarà tant che un lari. In chê volte i cîi a passaran cun grant fracàs: lis robis, consumadis dal calôr, si dislidaran e la tiere cun dut ce ch'e à dentri e sarà fiscade.

Stant che dutis chestis robis a an di sfruçonâsi, trop sante e plene di religjon no aie di jessi la vuestre vite, biel ch'o spietais e o corês incuintri a la vignude de zornade dal Signôr, cuant che i cîi si disfasaran e lis robis si fondaran pal grant fûc! E po, daûr de sô promesse, nô o spietin cîi gnûfs e une tiere gnove, là che la justizie e sarà di cjase par simpri.

Alore, miei cjârs, intant ch'o spietais chescj fats, cirît di jessi cence magle e cence pecjât denant di Diu, in pàs.

Peraule di Diu.

CJANT AL VANZELI

Lc

3,4.6

R. Aleluia, aleluia.

Prontait la strade pal Signôr,

splanait i siei trois!

Ogni om al viodarà la salvece di Diu!

R. Aleluia.

VANZELI

Mc

1,1-8

Dreçait la strade dal Signôr.

Zuan al cjacare di cualchidun di grant e nus dîs: jo o bati cun aghe, ma lui us batiarà cul Spirtu Sant.

O vin di preparâsi al Nadâl te conversion pe remission dai pecjâts; chest al è necessari, ma za o vignìn visâts che Gjesù al vignarà framieç di nô cuntun regâl dal cîl, il don dal Spirtu Sant, risultive, sapience e sostentament par une gnove vite.

Duncje, ancje par chest motif: Splanait la strade dal Signôr, dreçait i siei trois.

Dal vanzeli seont che dome li Marc

Inizi dal vanzeli di Gjesù Crist, Fi di Diu. Come ch'al è stât scrit in Isaie profete:

“Ve, jo o mandî il gno mes denant di te,
ch'al prontarà la tô strade.

Vôs di un ch'al berle tal desert:

Splanait la strade dal Signôr,
dreçait i siei trois”.

Al comparî Zuan il Batiste intal desert, predicjant un batisim di conversion pe remission dai peçjâts. A levin di lui dute la int de regjon de Gjudee e di Gjerusalem, e si fasevin batiâ di lui tal flum Gjordan intant che a confessavin i lôr peçjâts. Zuan al jere vistût di pêi di camêl e al veve une cinturie di corean ator dai ombui e si passeve di zupets e di mêl salvadie. Al predicjave disint: «Daûr di me al ven un ch'al è plui fuart di me, che jo no merti nancje di sbassâmi a disgrupâ la coree de sô cjalçadure. Di fat jo us ai batiâts cun aghe, ma lui us batiarà cul Spirtu Sant».

Peraule dal Signôr.

Si dîs O crôt.

Su lis ufiertis

Lassiti bonâ, Signôr, des preieris e des ufiertis
che ti fasîn te nestre puaretât,
e là che no rivin i nestris merits, che no 'nt vin,
vegninus incuintri cul jutori de tô misericordie.
Par Crist nestri Signôr.

Antifone a la comunion

Ba 5,5;

4,36

Jeve sù, Gjerusalem e metiti adalt:
viôt la gjonde che ti ven dal to Diu.

Daspò de comunion

Sostentâts cu la bocjade ch'è nudris la nestre anime,
ti prein, Signôr, di insegnânus,
midiant de partecipazion a chest misteri,
a pesâ cun sintiment lis robis di cheste tiere
e a tacâsi a chês dal cîl.
Par Crist nestri Signôr.

* * *

Riflession di pre Antoni Beline: **Berlâ tal desert**

Ogni di, passant il Vieri Testament, o sintin la vôs fuarte, rissolude, sigure, consolant di Isaie, che al fevele di lûs, di pâs, di bondance di forment e di vueli, di grancj gustâs su la mont sante di Diu, la che ducj i popui a varan dirit di comodâsi te grande taulade, scomençant dai plui debui e flaps. E ancje il Gnûf Testament al comence cuntune vôs fuarte e tremende: Zuan, che al batiave...

Vanseli par un popul,

an B, p. 13.

* * *

Cjants di Avent: *dal numar 88 al numar 97.*

88 - La gnove scoltait

89 - Rorate caeli desuper

- 90 - Inte gnot la vôs nus clame
91 - No sta vê pôre
92 - Ormai al è dongje
93 - Viergêt lis puartis dal lûc sant
94 - A son oms che no àn nuie
95 - Il Redentore ascolta la nostra voce
96 - Tu, quando verrai, Signore Gesù
97 - Vieni, Sapienza altissima

Salm 84: Tu sês stât bon Signôr cu la tô tiere, *n.* 257.

Vinars 15 e comence la novene di Nadâl.

Pe novene: Hosanna pp. 212 – 231.

“Missus est - Celebrazione della novena di Natale”; *in talian e furlan.*

* * *

Noaltris spes o pensìn che Diu nol scolti lis nestrìs domandis.

In realtât, o sin nô che no scoltìn lis sôs rispuestis.

F. Muriac

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris*

dal popul furlan, Ed. Glesie Furlane, 2012.

* *Il cjant dai salms resposoriâi, Ed. Glesie Furlane, 2012.*

* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*

* *Par domandâ chescj libris scrivêt a info@glesiefurlane.org*